



L'investgieu da Cuira ha preschentà in codex da cumportament per evitar abus sexual e spiritual.

FOTO SOMEDIA

# Prevegnir ad abus da pussanza

La discussiun davart abus sexuals e spirituals en la Baselia catolica mussa cun tutta evidenza quant impurtanta che la prevenziun da maldiever da pussanza è. Ier ha l'investg da Cuira Joseph Maria Bonnemain ed ils gremis da la Baselia statale preschentà cuminaivlamain a la publicitad in Codex da cumportament per prevegnir a tals abus.

MARTIN CABALZAR/FMR

Damai che las structuradas da la Baselia catolica sajan pesantas e plaunas, dovria urgentamain instruments che lubeschian da reflectar criticamain la pussanza, respectar la dignitad umana e garantir la segirezza da qualitad, han punctuà ils responsabels a la conferenza da pressa ier a Cuira. Sco emprima diocesa en Svizra ha l'investgieu da Cuira elavurà cuminaivlamain cun ils perturgads in Codex da cumportament che è ussa liant per tut las collavuraturas ed ils collavuratur en servetsch ecclesiastic e natiralmain era per ils gremis directivs.

## Prevegnir ad abus spirituals e sexuals

«Il nov codex duai dar orientaziun per in tractament avert, ina cultura lianta ed obliganta e garantir trasparenza sin tut ils stgalims da l'ierarchia ecclesiastica» ha declerà l'investg *Joseph Maria Bonnemain*. Il Codex da cumportament na duai betg esser in «tigher da palpiri», mabain in «mussavia concret e liant» cun pretenziuns cleras, impuls concrets per in dialog avert

e standads da qualitad verifitgabels, ha secundà *Karin Iten*, la nova incumbensada per prevenziun da l'investgieu. Aschia duai tranter auter vegnir mess il focus sin il dischequilibr da pussanza e las relaziuns asimmetricas tranter represchentants da la baselia ed uffants, juvenils e persunas creschidas engaschadas en la pastoraziun u en la lavur da giuventetgna. Quai vala dentant era per la relaziun tranter collavuraturas e superiors. *Karin Iten* e *Stefan Loppacher* n'han betg elavurà quest document «davos ischa serrada», sco els din, mabain a «moda participativa» cun la basa. Cun metter lur sutscriziun sut il document han ils parsuras da tut las 7 baselgias chantunales da l'entir investgieu ed ils vicaris generals attestà ier a Cuira ch'il codex vegn era purtà solidaricamain dals gremis profans. Ils proxims dis vegn il document surdà a las plavis ed a tuts engaschads en servetsch ecclesiastic.

**Avis concrets per evitar situaziuns criticas**  
La finamira dil codex saja da stgaffir in clima d'avertadad, trasparenza, respect, toleranza e

confidenza entaifer la baselia, declerà Bonnemain. I giaja era per promover il dialog, evitar temas, impedir tenutas servilas e promover la professionalitad en situaziuns da conflict. Da l'autra vart porschia il codex era segirezza ed ina tscherta protecziun per las persunas engaschadas en la pastoraziun.


Il Codex cuntogna avis concrets per evitar situaziuns criticas sco per exempel per evitar manipulaziuns spiritualas, separar lavur e vita privata e respectar l'integritad corporala e la sfera intima e privata. Sco quai ch'igl è vegnì punctuà a la conferenza da pressa stettian tut las acturas e tut ils acturs en servetsch da la baselia che suttascrivan il codex uss en la responsabladad da discutir, implementar ed exequir las directivas. «La pussanza sforza a reflexiun, attentivitat, premura e trasparenza, pertge la violaziun da cunfins è fitg grevgianta, cunzunt en structuradas da pussanza asimmetricas», punctuescha *Karin Iten*. Pussanza pretendia d'agir cun senn da responsabladad, il codex da cumportament possia dentant era rinforzar tuts en quest process.

## «Nus essan sin buna via, i resta dentant anc bler da far!»

Dapi prest in onn è Joseph Maria Bonnemain en uffizi sco investg da la diocesa da Cuira. La FMR ha fatg cun el ina curta bilanza cun trais dumandas.

**FMR:** Dapi in onn essas *Vus* investg da Cuira. Ins ha tschentà en *Vus* grondas speronzas e giavischà che *Vus* bajas in bun maun (*nomen est omen*) per anflar il dialog e far punts en in investgieu dischunì. E quai reussi?

**Bonnemain:** Las spetgas èn facticamain stadas usche grondas che probabel mo Dieu po ademplir ellas. (ri) Jeu persunalmain hai l'impressiun che jau hai anc cuntanschi plitost pauc. Jau vulesch numnadamain cuntanscher ina diocesa che viva ensemen armonicamain sco en ina famiglia. I dat anc adina tensiuns tranter las differentas gruppaziuns che cumbattan ina l'autra empe da sa focussar sin nosa incumbensa primara d'annunziar il pled da Dieu e d'esser qua per ils umans. En ils set chantuns da nosa diocesa dati anc bliers umans che n'han anc betg discuvrì il plaschir da suandar Cristus. Adina pli paucs umans anflan la via en baselia, qua resta anc blier da far.



L'investg da Cuira, Joseph Maria Bonnemain.

FOTO MARTIN CABALZAR

**Vus avais er plidà oz a la conferenza da pressa d'ina midada da cultura entaifer la baselia catolica. Tge manegiais *Vus* concret cun quai?**

Cun quai manegiel jau che in e scadin surpiglia responsabladad per ses agir. Per la baselia na dastga betg la pussanza esser d'impurtanta, mabain bleranz il servetsch al conuman ed a la cuminanza. Quai stuess esser la finamira e la responsabladad dad in e scadin.

**Vus avais er menziunà en quest connex la via sinodala. Munta quai er che la baselia duess crescer da sutensi, daventar pli democratica e respectar l'egualitad d'um e dunna?**

Nus na plidain betg d'ina via sinodala, mabain d'in process sinodal. Quai include la fin finala er l'intenziun d'ina midada. Quai na po dentant betg succeder d'in di sin l'auter e drova temp. En ina democrazia scadin che tschertga da persvader l'auter e da contonscher usche dapli pussanza. Quai na po betg esser la finamira da la baselia, che sto metter il messadi da l'evangeli e sia concretisaziun en la pratica en il center. Las dunnas han dal reminent adina adempli in'impurtanta funcziun entaifer la baselia, perquai èsi er pli che giustifitgà ch'ellas sajan represchentadas meglier en ils gremis directivs da quella.